

Esperiencis

Il concurs "Glemone Ir, vuei e doman" Edizion XXI al domande un scrit pai fruts di undis agns.

O riten che un frut di undis agns nol sedi plui un frut di flabis, ma di fats reâi. O bramarès capî ce che al pense e cemût che lui al viôt il presint e l'avignî. Un frut moderni cun ideis modernis e gnovis. Par chest o cirarai di meti adun une experience fate cu la nestre comunitât compagnade di fruts di ogni età. Une cjaminade di tant timp pensade, che e veve come finalitât la scjavaçade dal Tiliment. Une cjaminade par unî lis dôs spuindis dal flum, stant che l'aghe no divît la int, ma la unîs.

Par peâ cheste experience al dì di vuê, o scugni lâ indaûr al timp de seconde vuere mondiâl.

A contavin i nestris viei, che tal 1940-45, il nestri Friûl no si cjatave dome tal mieç de vuere, ma ancje tune grande miserie. La plui part des fameis a "campavin" di lat e polente. Tacuins e musinis no coventavin, stant che bêçs par meti dentri nond' jere. I curtîi a jerin formâts di tantis cjasis, dulà che a viveve unevore di int. Dispès al nasseeve cualchi radego, cause un confin, oben un cjar lassât dute le gnot su la proprietât promiscue. Ma lis piçulis cridis a scugnivin in curt dismenteâlis, stant che la dibisugne di dut e di ducj a jerin lis primis necessitâts.

Pai fruts invezit i curtîi a jerin une grande gracie, parcè che par zuiâ, la mularie, si la cjatave di fûr de puarte di cjase. Fra tancj zûcs ur plaseve zuiâ di cu-cuc lant tal *rifugio*. Il rifugio al jere un ripâr, fûr des cjasis, dulà che la int si platave cuant che al passave Pippo "*Pippo e jere clamade la formazion aeree che a molave jù bombis*" lì ta chê grande buse sgjavade te tiere, in timp di vuere, cuant che al passave Pippo, la int plene di pôre e coreve a taponâsi. I zovins, come che al jere just, no pensavin dome ai bombardaments, ma a vevin cjatât un pôc di straviament tal bal.

A faur compagnie tal bal, si zontavin la zoventût di "*di là de aghe*", ven a stâi i fantats e lis fantatis di Cose e di Poç. Il bal in chê volte al jere un "*tabù*", un scandul tal paîs, che a dite de int, lis fantatis che a lavin a balâ, si jerin cjapadis il non di sdrondinis. A judâ lis malilenghis, il predi che a messe si refudave di daur la comunione.

Tal libri scrit di Alessandra Lenarduzzi "Aga par vivi" si lei:

"Cuant ch'a no era aga i sevin a balâ par di là dal Tiliment a San Durì una volta i erin in 23 di noaltris, i vin giavât lis cialcis e i sin sudis via discolsis, al era il dì da la Madonna Sirlola, il doi di frevâr"

Testimoniance di Linda nade tal 1919.

La scjavaçade dal Tiliment la fasevin lant e tornant di gnot.

Leint ce che o ai scrit o pensarîs, cjârs fruts, che o sedi lade fûr de cumiere, ma cumò o torni in curt te agâr.

Di chescj bai proibîts a son passâts tancj agns, ma il ricuart tai trê paîs al è ancjemò vîf.

Cussì dacuardi cu le ostere di Cose *di là de aghe* e cu le associazion “Sot il Tei” *di cà de aghe* o vin fate la tant bramade scjavaçade.

Domenie 20 di Avost 2017 a lis nûf di buinore, pronts te place di San Duri par partî. Si jere ben 94 di nô. Novantecuari personis tra vecjos, zovins e fruts.

La sere prime al jere stât un piçul temporâl cun pocje ploie. Prime di partî un grop di zovins a son lâts a sigurâsi che sul flum no fos aghe, Tornâts a àn confermât che il Tiliment al jere a sut. Cussì o sin partîts legrîs e contents cjantant e ridint. I fruts sul Tiliment e àn cjapadis sù slavaris e claps di ogni colôr. Il cîl al jere seren, lis montagnis netis e claris nus fasevin viodi lis lôr bielecis. Ancje i uceluts a cjantavin compagnantnus.

Il program al jere chel di rivâ a Cose lì i varessin podût fâ une visite al cjistiel e po bagnâ il glutidôr te ostarie di Giuliana.

La storie dal cjistiel e à inizi tor il 1000. Si lei te storie che il palaç al vignive doprât par vuardiâ i terens dongje dal Tiliment. Su le rive al esistevê ancje un puart pa lis barcjis che a cjariavin e a scjariavin robe. Cul lâ dal timp chest cjistiel al à vût tancj cambiaments e al à cambiât tancj parons. Nobii todescs e furlans e àn vût l'onôr di vê vivût dentri. Il cjistiel, come che al è cumò, al è tornât a fâ sù, sui rescj di ce che al jere restât de prime vuere mondiâl. A metilu in sest a son stâts i conts di Atimis Maniago. Dal 1978 il palaç al à come parons i siôrs Furlan. Chest cjistiel, mantignût cul stîl antîc, al è biel e ben tignût. Dentri si pues viodi, pituris e mobii di preseade fature. Te cantine vins di dutis lis sortis. Lì a puedin lâ amîs e nuvits a fâ cenis e a gjoldi il bon mangjâ e il cidinôr dal lûc.

La visite fate in chest lûc e je stade di ducj preseade. Un ricuart pai vielis e pai zovins.

Finide cheste visite e metût tal bultric ce che l'ostere nus veve preparât, si sin inviâts viers cjase, ven a stâi lassant la Provincie di Pordenon e tornant in chê di Udin. Nol jere altri mût che tornâ a scjavaçâ un'altre volte il Tiliment.

Ma...

Rivâts sul flum, o vin cjatade une grande sorprese: un grant canâl di aghe. Alore, daspò sintudis lis personis anzianis si sin cjapâts par man e un daûr chel altri o vin frontade la corint. Intant che o gjavavin lis scarpis l'aghe e cresseve...e cresseve...

Ma no jere finide cussì, un'altri canâl nus spietave di scjavaçâ. L'altece de aghe e rivave sui 50-60 centimetris. I fruts plui piçui a son stâts puartâts a sacodecis dai paris, i plui grancj e àn volût passâ bessôi.

No lu sai tropis fotografiis che a son stadis fatis!

Ma nus je lade ben, cun tante aghe, o vin riscjât di restâ tal mieç dal flum, jenfri di un canâl a chel altri. No saressin stâts i prins a vê bisugne di un elicotar!

Cuant che ducj o sin rivâts inte place, di dulà che o jerin partîts, bagnâts strafonts, i responsabii tirât un “Glorie di Diu”, nus àn compagnâts a mangjâ la pastessute. A danus il ben rivâts a jerin i nestris di famee e il sindic. Par une setemane tal paîs e je zirade la vôs de nestre biele cjaminade. Sui telefonins si son viodudis lis inmagjinis dal “*guado*” e i coragjôs e bulos personaçs. La associazion “ Sot il Tei” e à prometût di fâ un C.D

L’esperience fate e à lassade la voie di ripetile il prossim an.

No son tancj fruts de vuestre etât che e àn cjaminât sul savalon dal Tiliment, provânt a cirî slavaris e claps di ogni misure e di ogni colôr. Salacôr un clap cul bûs, unevore râr, al spiete dome di jessi cjapât sù di vualtris. E po la frescje e nete aghe, dal flum plui grant dal Friûl, us regalarà une gjonde mai provade.

Se cualchi frut al lei ce che o ai scrit e che i vegni la curiosetât, la volontât di provâ a vignì a cjaminâ cun nô chest an cu ven, lu spietìn.

(O ai scugnût meti i nons dai paîs, di chest mi scusi)